


Emil MUJKIĆ, bachelor historije

NAUČNI SKUP „HISTORIJA DRŽAVE I PRAVA BiH – IZAZOVI I PERSPEKTIVE“

(POVODOM PEDESET GODINA NAUČNOG I PUBLICISTIČKOG RADA PROF. DR. MUSTAFE IMAMOVIĆA)



Nastavljajući tradiciju organizovanja naučnih skupova, okruglih stolova, tribina i drugih vidova prezentacije rada i djela nekih od najistaknutijih baštinka naše prošlosti, JU Zavod za korištenje i zaštitu kulturno-historijskog i prirodnog naslijeđa Tuzlanskog kantona je krajem novembra 2014. godine organizovao i naučni skup povodom pedeset godina naučnog i publicističkog rada prof. dr. emeritusa Mustafe Imamovića. Punim nazivom „Historija države i prava BiH – izazovi i perspektive“, naučni skup je održan od 28. do 30. novembra 2014. godine u konferencijskoj sali hotela Tehnograd (Slavinovići, Tuzla). Impresivna naučna

biografija i bibliografija, kao i opšta društvena reputacija Mustafe Imamovića, koji je svojim plodonosnim pedesetogodišnjim akademskim angažmanom umnogome utjecao na nekoliko generacija pravnika, historičara, filozofa, pedagoga, teologa, politologa, kao i na cjelokupnu naučnu javnost BiH i regiona, garantovala je dobar odziv domaćih i stranih naučnika. Skup je okupio eminentna naučna imena sa Univerziteta u Tuzli, Sarajevu, Mostaru, Travniku, Zenici, Bihaću, a naučne radove izložili su i kolege iz Zagreba, Splita, Osijeka i Novog Pazara.

Naučni skup zvanično je otvoren u petak 28. novembra u 17:00 sati pozdravnom riječju domaćina – prisutnima se tom prilikom ispred organizatora, Zavoda za zaštitu i korištenje kulturno-historijskog naslijeđa Tuzlanskog kantona, obratio direktor Benjamin Bajrektarević, da bi nakon njega riječ uzeo i sam prof. dr. Mustafa Imamović, redovni profesor – emeritus, čiji jubilej je i bio povod održavanja ovog naučnog skupa. Prije nego će i sam izložiti vlastitu temu, dobrodošlicu svim prisutnima poželio je i dr. sc. Edin Mutapčić sa Pravnog fakulteta Univerziteta u Tuzli. Inače, profesor Mutapčić, zajedno sa nekolicinom drugih profesora sa Pravnog fakulteta Univerziteta u Tuzli, znatno je pomogao Zavodu za zaštitu i korištenje kulturno-historijskog i prirodnog

naslijeđa Tuzlanskog kantona pri organizovanju ovog naučnog skupa pa im se Zavod i ovaj puta svima zahvaljuje. Nakon pozdravne riječi, dobrodošlice i svečanog otvorenja, do kraja prvog dana naučnog skupa prikazano je pet uvodnih izlaganja. Čast da prvi izloži svoju temu „Odjek Balkanskih ratova u BiH: promjena paradigme bošnjačkog vođstva“ dobio je dr. sc. Fikret Karčić, redovni profesor sa Pravnog fakulteta Univerziteta u Sarajevu, a nakon njega izlagao je, također sa Pravnog fakulteta Univerziteta u Sarajevu, dr. sc. Enes Durmišević, vanredni profesor, čija tema je nosila naziv „Srednjovjekovna bosanska kancelarija“. Dr. sc. Miro Gardaš, izvanredni profesor i Daniel Haman, mag. iur., ass., sa Pravnog fakulteta u Osijeku, izložili su zajedničku temu „Regalno pravo lova i lovno zakonodavstvo u Hrvatskoj kroz povijest“. Uslijedila je tema „Historijska dimenzija prava“ mr. sc. Jasmina Brankovića iz Federalnog ministarstva obrazovanja, koji iz opravdanih razloga nije prisustvovao naučnom skupu, te još jedno zajedničko izlaganje, ovaj puta kolega sa Pravnog fakulteta u Splitu, dr. sc. Mirele Šarac, red. prof. i Tine Miletić, ass., na temu „Salvum fore recipere“, kojim je zaključen prvi dio naučnog skupa.

Naučni skup nastavljen je sljedećeg dana, u subotu 29. novembra od 10:00 sati. U njegovom drugom dijelu (Historija države i prava Bosne i Hercegovine) izloženo je ukupno četrnaest naučnih radova. Ovaj dio skupa započeo je dr. sc. Sead Selimović, vanredni profesor sa Filozofskog fakulteta u Tuzli, sa temom „Položaj Bosne i Hercegovine prema jugoslovenskom ustavu iz 1963. godine“, da bi nakon toga svoj rad na temu „Razvoj historiografije u Bosni i Hercegovini sa posebnim osvrtom na historijsko-pravnu nauku“ izložio i dr. sc. Edin Mutapčić, vanredni profesor sa Pravnog fakulteta Univerziteta u Tuzli. Skup je nastavila dr. sc. Elvira Islamović, vanredni profesor sa Pedagoškog fakulteta u Bihaću, sa temom „Žene i rad – od privatnog do javnog“ te poslije nje dr. sc. Hamza Karčić sa radom da temu „Da li je u BiH na sceni zamrznuti sukob?“. Dr. sc. Omer Hamzić, docent (Pravni fakultet Univerziteta u Travniku i časopis „Gračanički glasnik“) nastupio je sa svojom temom „Uloga Džafera Kulenovića u obnavljanju programa i organizaciji pokreta za autonomiju BiH, 1939.“, nakon čega je rad na temu „Novo europsko IUS commune – primjer DCFR-a“ izložila dr. sc. Anita Petrović, docent, sa Pravnog fakulteta Univerziteta u Tuzli. Također sa Pravnog fakulteta tuzlanskog Univerziteta, sa temom „Historijski razvoj maloljetničkih krivičnih sankcija u domaćem i uporednom krivičnom pravu“, nastupio je i dr. sc. Vedad Gurda, docent. Sa Islamskog pedagoškog fakulteta u Bihaću, rad na temu „Medžella – nova paradigma primjene kodifikovanog, šerijatskog, materijalnog prava u sudstvu“ izložio je dr. sc. Muharem Štulanović, redovni profesor. Dr. sc. Amra Mahmutagić, docent, sa Pravnog fakulteta Univerziteta „Džemal Bijedić“ u Mostaru nastupila je sa temom „Osvrt na specifičnosti pravnog partikularizma i unifikacije prava na području Kraljevine SHS“. Nakon polusatne pauze program naučnog skupa nastavljen je izlaganjem mr. sc. Mehmeda Bečića, višeg asistenta sa Pravnog fakulteta Univerziteta u Sarajevu, na temu „Prvi građanski parnični postupak za Bosnu i Hercegovinu“ te zajedničkim radom koji su na temu „Neki problemi iz pravnog okvira oblasti zaštite i

korištenja naslijeđa Tuzlanskog kantona“ izložili mr. sc. Rusmir Djedović i mr. Semir Hadžimusić iz Zavoda za zaštitu i korištenje kulturno-historijskog i prirodnog naslijeđa Tuzlanskog kantona. Uslijedila su izlaganja mr. sc. Ajdina Huseinspahića, višeg asistenta sa Pravnog fakulteta Univerziteta u Zenici, na temu „Pravno regulisanje vanbračne zajednice nakon Drugog svjetskog rata u Bosni i Hercegovini s osvrtom na njeno uređenje de lege lata i de lege ferenda“ i mr. sc. Benjamine Londrc, asistentice sa Pravnog fakulteta Univerziteta u Travniku, koja je predstavila svoj rad na temu „Bojkot jevreja u bosanskohercegovačkim gradovima 1925. godine“. Drugi dan naučnog skupa zaključen je zajedničkom temom Tijane Muftić i Milice Petrović iz Zavoda za zaštitu i korištenje kulturno-historijskog i prirodnog naslijeđa Tuzlanskog kantona – „Društvena struktura srednjovjekovne Bosne“.



Sl. 1. Detalj sa naučnog skupa

Treći dio naučnog skupa (Općehistorijske teme – pravna historija Evrope i mediterana) počeo je izlaganjem dr. sc. Dževada Drine, vanrednog profesora sa Pravnog fakulteta Univerziteta u Zenici, na temu „Kratok pregled povijesti rimskoga naroda“. Nakon njega rad na temu „Sudske doktrine“ izložio je dr. sc. Edin Halapić, docent, sa pravnog fakulteta Univerziteta u Sarajevu, dok je mr. sc. Ehlimana Memišević, viša asistentica sa Pravnog fakulteta Univerziteta u Sarajevu, nastupila sa temom „Mudawanna: porodični zakon Maroka“. Mr. sc. Joško Pavković, viši asistent (Sveučilište u Zagrebu, Hrvatski studiji) izložio je rad pod nazivom „Herodot: Otac historije?“. Skup je izlaganjem svog rada na temu „Personifikacija pravičnosti (aequitas) na rudničkom novcu provincija Dalmacije i Panonije e vreme cara Trajana“ zaključio dr. sc. Samir Aličić, docent, sa pravnog departmana Državnog univerziteta u

Novom Pazaru, nakon čega je za sve učesnike i goste ovog naučnog skupa upriličen svečani ručak u etno-avliji Mačkovac.

Upravo ovako širok spektar obrađenih tema, ali i samih učesnika, počevši od onih sa naučnim stepenom doktora nauka pa do novih, mladih i ambicioznih naučnika, najbolje govori o opravdanosti i uspješnosti održavanja ovog naučnog skupa. Izvjesno je i to da će skup rezultirati i uspostavljanjem bolje buduće saradnje između učesnika, ali i institucija ispred kojih su se na njemu pojavili. Takav ishod skupa od velike je važnosti i za sam Zavod za zaštitu i korištenje kulturno-historijskog i prirodnog naslijeđa Tuzlanskog kantona, koji već nekoliko godina unazad redovno organizuje slične manifestacije (naučni skup posvećen Šefiku Bešliću, okrugli stolovi i tribine posvećene Ademu Handžiću, Hifziji Suljkiću, Salihu Kulenoviću itd.) i za nadati se da će u budućnosti biti znatno olakšano organizovanje sličnih skupova, koje Zavod svakako ima u planu.